

Morning Regional Dogri News Bulletin, 19th October 2024

मार्निंग डोगरी न्यूज़ बुलेटिन, समें. 09-20 Hrs



Headlines

- 1 प्रधानमंत्री नरेन्द्र मोदी होर अज्ज नमीं दिल्ली च कर्मयोगी सप्ताह दा शुभारंभ करगंन।
- 2 उपराज्यपाल मनोज सिन्हा होरें मुबारक गुल होरें गी जम्मू कश्मीर विधानसभा दा प्राटेम स्पीकर नियुक्त कीता ऐ, ओह सोमवारें गी सगंध चुक्कांगन।
- 3 मुख्मन्त्री उमर अब्दुल्ला होरें शोपियां च आतंकवादिएं आस्सेआ इक बिहारी ध्याड़ीदार दी हत्या पर गैहरा दुख प्रगट करदे होई एह सख्त निंदेया कीती ऐ।
- 4 सुरनकोट च आतंकवादिएं लेई कम्म करने आले इक आदमी गी गिरफ्तार करियै ओह कबते शा किश ग्रनेड बरामद कीते गे न।
- 5 क्रिकेट च न्यूजीलैंड खलाफ टैस्ट मैच च भारत अज्ज 231 रंज कोला अग्गे खेडोग। तोआई महिला टी-20 विश्व कप च न्यूजीलैंड दी टीम फाइनल च पुज्जी गई ऐ।



PM-Karmayogi

प्रधानमंत्री नरेन्द्र मोदी होरें अज्ज नमीं दिल्ली च कर्मयोगी सप्ताह राष्ट्रीय शिक्षण सप्ताह दा शुभरंभ करगंन। इस हफते दरान हर इक कर्मयोगी, घट्ट शा घट्ट4 घेंटे दी योग्यता आधारित सिखलाई दे लक्ष्य गी पूरा करोग। आकाशवाणी संवाददाता मूजब राष्ट्रीय शिक्षण सप्ताह दरान कोई बी व्यक्ति जां विभाग संगठन ते मंत्रालय बक्ख-बक्ख किस्में दे ज्ञान ते सिखलाई हासल करी सकगंन। मिशन कर्मयोगी दी शुरुआत सितम्बर 2020 च कीती गई ही जेहदा मकसद नागरिक आधारित सुशासन गी इक मजबूत डिजीटल प्रणाली दी मदद कन्नै बढ़ावा देना ऐ। इस मिशन गी सिवनि कर्मयोगिएं दी योग्यता समर्थ बधाने ते मनुक्खी साधन वसीलें गी मजबूत करने दे मकसद कन्नै तैआर कीता गेदा ऐ। राष्ट्रीय शिक्षण सप्ताह दरान व्यक्तिगत ते संगठनात्मक समर्थ विकसित करने पर जोर दित्ता जा'रदा ऐ। प्रतिभागिएं गी आईजीओटी प्लैटफार्म पर उपलब्ध कोर्स गी पूरा करना होग। एह कोर्स वेबीनार फारमर च न ते माहिरें आस्सेआ तैआर कीते गेदे न।



J&K Pro Tem Speaker

जम्मू कश्मीर दे उपराज्यपाल मनोल सिन्हा होरें नैशनल कांफ्रेंस दे विधायक मुबारक गुल होरें गी नमी विधानसभा दा प्रोटेम स्पीकर नियुक्त कीता ऐ। जम्मू कश्मीर विधानसभा सचिवालय दी तरफा जारी इक हुक्मै मूजब, श्रीनगर दी इदगाह विधानसभा सीट परा 6मीं बारी जित्तने आले मुबारक गुल होर अत्तरू संगारै, नमें चुनोए दे विधायकें गी सगंध चुक्कागंन।



Indian Mobile Congress

इंडिया मोबाइल कांग्रेस आईएमसी 2024 कल नमीं दिल्ली दे भारत मंडपम च सम्पन्न होआ। 4 रोजा इस कार्यक्रम च 190 शा मते देशें दे प्रतिनिधिएं हिस्सा लैता। इस आयोजन च 3 ज्हार शा मते उद्योगपतिएं, नीतियां बनाने आले ते तकनीकी विशेषज्ञ शामिल होए। प्रधानमंत्री नरेन्द्र मोदी होरें इस म्हीने दी 15 तरीक गी इंडिया मोआइल कांग्रेस दा उद्घाटन कीता हा। साढे संवाददाता नै दस्सेआ जे नीतियां बनाने आले ते उद्योगपतिएं डिजिटल बदलाव ते नमें तरीके दे रोडमैप पर तेजी आनने आस्तै सैहयोग करने दा आह्वान कीता ऐ।



Fire Crackers

देयाली कोला पैहले बम्ब पटाखे दे नियंत्रण गी सख्ती कन्नै लागू करदे होई जिला मैजिस्ट्रेट जम्मू सचिन कुमार वैश्य होरें उपजिला मैजिस्ट्रेट गी सारे बम्ब पटाखें दे गोदामें दा निरीक्षण करने दे निर्देश दित्ते न। एह्दे परैंत ओह त्रै दिन दे अंदर कारवाई रिपोर्ट जमा करोआंगन ते नियमें दी पालमा नेई करने आलें दे खलाफ सख्त कारवाई दी चेतावनी बी दित्ती गई ऐ। ध्यारें गी दिक्खदे होई तैआरिणं दा जायजा लैंदे होई अगग साहलने आले विभाग गी महत्वपूर्ण थाहर पर तैनात रौहने दे आदेश दित्ते गे न। ट्रैफिक गी काबू च रखने बारे चर्चा कीती गई। ध्यारें दे दिनें गी दिक्खदे होई खास साफ सफाई मुहिम चलाने बारे बी आखेआ गेआ।



NH Nowshera

जिला विकास आयुक्त डीडीसी राजौरी अभिषेक शर्मा होरें कल राष्ट्रीय जरनैली शिड़क पर चला'रदे दे कम्में दा जायजा लैने आस्तै थाहरें पर जाइयै निरीक्षण कीता। एह्दे कन्नै गै सीमा सड़क संगठन बीआरओ तरफा चलाए जा'रदे नौशेहरा सुरंग परियोजना दे कम्म दा बी निरीक्षण कीता। निरीक्षण दरान डीडीसी होरें विकास

कम्में गी तैह कीते गेदे समें अंदर पूरा करने ते हाई क्वालटी मानकें गी बरकरार रखने दी जरूरतै पर जोर पाया। नौशहरा सुरंग राष्ट्रीय जरनैली शिड़क परियोजना दा इक खास अंग ऐ जेहदे कन्नै क्षेत्र दा संपर्क, हर मौसम च गडिडएं दी बगैर रुकावट दे आओजाई कन्ने मजबूत होग। एहदे पूरा होई जाने करी सफर च समे बी बचोग ते शिड़क सुरक्षा च बी सुधार होग।



Road Reasi Safety

जिला उपायुक्त रियासी विषेश महाजन होरें जिला शिड़क सुरक्षा समिति दी बैठक दी कल अध्यक्षता कीती ते जिले च शिड़क सुरक्षा गी लेइयै कार्य योजना पर चर्चा कीती गई। ट्रैफिक नियमें दी लगातार पालमा नेई करने आले खलाफ सख्त कारवाई करदे होई डीसी होरें परिवहन अधिकारिएं गी नेह डरैवरें दे लाइसेंस रद्द करने दे निर्देश दित्ते, जिंदे कारण शिड़क हादसे हुंदे न ते इनेंगी फही नमां लाइसेंस डरैविंग टैस्ट पास करने दे परैत गै दित्ता जाग। डीसी होरें पीडब्ल्यूडी, लोक निर्माण विभाग ते प्रधानमंत्री ग्राम शिड़क योजना दे एक्सईएन गी त्रिक्खे मोड़, जित्थें डूहंगी खड्डें कारण हादसा होने दा खतरा बने दा रौहदा ऐ, दी शिनाख्त करने ते थाहरें पर बैरियर लोआए जान। बैठक च फैसला लैता गेआ ऐ जे ध्यारें गी दिक्खदे होई पुलस, ट्रैफिक पुलस ते परिवहन विभाग शिड़क सुरक्षा पक्की करने दे मकसद कन्नै नाक्के लांगन।



CM-Condeme

मुख्यमंत्री उमर अब्दुल्ला होरें शोपियां च आतंकवादिएं आस्सेआ अशोक चौहान नां दे इक आदमी दी हत्या कीते जाने दी सख्त निंदेया कीती ऐ। अपनी इक सोशल मीडिया पोस्ट पर उमर अब्दुल्ला होरें बिहार दे रौहने आले इस आदमी दी हत्या दी निंदेया करदे होई ओहदे परिवार आले कन्नै हमदर्दी प्रगट कीती ऐ। जियां जे पैहले बी खबर दित्ती जाई चुकी दी ऐ जे अशोक चौहान नां दे इस आदमी दी गोलिएं कन्नै छलनी लोथ कल बडलै शोपियां दे वदाना मलहोरा इलाके थमां मिली। बिहार दा बसनीक अशोक चौहान अनंतनाग दे संगम इलाके च रौहदा हा ते मक्कां बेचने दा कम्म करदा हा।



J&K Terror Link

तोआई सुरक्षाबलें कल पुंछ जिले दे सुरनकोट सेक्टर दे दुंदक इलाके थमां आतंकवादिएं कन्नै सरबंध रखने आले इक आदमी गी गिरफ्तार कीता ऐ। ओहदे कब्जे थमां 4 ग्रनेड बी बरामद कीते गे न। पुलसै गी शक ऐ

जे पुंछ कस्बे ते सुरनकोट कस्बे च पिच्छे जनेई होए दे ग्रनेड हमले च बी इस बंदे दा हत्थ होई सकदा ऐ। इस बारे ओहदे कोला पुच्छ-गिच्छ जारी ऐ ते होर ब्योरे गी बलगेआ जा'रदा ऐ।



Samba Rally

21 अक्टूबर गी मनाए जाने आले राष्ट्री पुलस दिवस दे सरबंधै च जिला पुलस सांबा नै कल इक बाइक रैली दा आयोजन कीता ऐ। रैली देश दी रक्षा च अपने प्राणें दा बलिदान देने आलें गी श्रद्धांजलि स्वरूप आयोजन कीती गई। सांबा थमां आकाशवाणी संवाददाता सतपाल शर्मा नै दस्सेआ जे एह रैली कस्बे दे बक्ख-बक्ख थाहरें थमां गुजरियै डीपीएल जिला पुलस लाइन पर सम्पन्न होई।



Karvachaith

जियां गै कल करवाचौथ दा ध्यार मनाया जाना ऐ, जम्मू दे बजारें महिलाएं दी आओजाई कन्नै खूब रौनक लग्गी दी ऐ। पूरे ब'रे महिलाएं ते कुड़िएं गी इस ध्यार दा चेचा इंतजार रौहदा ऐ। खास तैआरिएं गी पूरा करने आस्तै महिलाएं दी समेयान आली दुकानें पर खास रश दिखने गी लब्भा'रदा ऐ। मेंहदी आली दुकानें पर ते उंदे बाहर लम्मी लम्मी रींगें च महिलाएं अपनी बारी दा इंतजार करदे होई लब्भदियां न। रिवायती गैहने , ांग बिरंगियां चुड़ियां, कपड़े, सजने संवरने, मेक अप दे समेयान आली दुकान पर बी भीड़ होने करी दुकानदारें बड़े खुश न। करवाचौथ दे ध्यार आले दिन महिला अपने घरे आले दी लम्मी उमरी आस्तै पूरे दिन निर्जन व्रत रखदियां न।



Women Cricket

न्यूजीलैंड महिला टी-20 क्रिकेट विश्व कप दे फाइनल च पुज्जी गई ऐ। कल रातीं संयुक्त अरब अमिरात शारजाह च होए दे सैमीफाइनल च न्यूजीलैंड लै वैस्टइंडीज़ गी 8एं रंज कन्नै हराया। न्यूजीलैंड नै पैहले बल्लेबाजी करदे होई 9 विकटें दे नुकसान पर 128 रंज बनाए। वैस्टइंडीज़ नै परते च 8एं विकटें दे नुकसान पर 120 रंज गै बनाई सकी। कल फाइनल च न्यूजीलैंड दा मकाबला दक्खन अफ्रीका कन्नै होग।



Cricket

बंगलुरु च खेड्डे जा'रदे भारत ते न्यूजीलैंड बश्कार मजूदा श्रृंखला दे पैहले टैस्ट मैच दे अज्ज चौथे रोज भारत त्रऊं विकटें दे नुक्सान पर 231 रंज कोला अगगे खेडोग। भारतीय टीम अपनी दूर्ई पारी अजें बी महमान टीम कोला 125 रंज पिच्छे ऐ। कल त्रीए रोज दी खीरी गेंद पर विराट कोहली 70 रंज पर आउट होए, सरफराज खान बी 70 रंज बनाइयै क्रीज पर हे। एह्दे शा पैहले रोहित शर्मा नै 52 ते यशस्वी जायसवाल नै 35 रंज दा योगदान दित्ता। एह्दे शा पैहले न्यूजीलैंड दी पूरी टीम अपनी पैहली पारी च 402 रंज पर आउट होई चुकी दी भारतीय टीम कोला 356 रंज दी शानदार बढ़त बनाई लैती ही।

<><><><><><>